

2 Pedro

¹ Høøch xøhajt Simón Pedro. Høøch hädaa nocy njahby. Ja'a Jesucristøch nmøødtuumby. Jaaya'ayhøch tøø xwiinguexy coochä miädia'agy nyajwá'xät. Tøø mijtsä Jesucristo xyajnähdijy coo hajxy hoy mmäbøgät jaduhñ mäwiin neby højts xyajnähdijjän. Tu'cuhdujt hajxy jaduhñ xquiumáayyäm nägøxiä je'eguiøxpä coo hajxy tu'cuhdujt nmäbøjcäm coo tiøyyä. Jaduhñ yajnajuø'øy coo Jesucristo yhojiäya'ayä. Jaaya'ay hajxy nDioshájtäm. Tøø hajxy xpiädáacäm hawa'adstuum. ² Ween mijtsä Dios ja'a hoyhajtä weenhajt xmio'oy møj may coo ja'a tøyhajt hajxy mmøødä ja'a Dioscøxpä møødä Jesucristocøxpä, ja'a hajxy nWiindsøn_hájtämbä.

³ Coo ja'a tøyhajt hajxy nmøødhájtäm ja'a Jesucristocøxpä, paadiä Dios hajxy madiu'u xpiuhbéjtäm ja'a miäjaahaam, jaduhñ hajxy hoy njäya'ayhájtämät. Mänitä Dios hajxy jaduhñ xquiumáayyämät. Jaanä miäjaahaamä Dios hajxy xyagjugyhadäänäm homiänaajä neby je'e jiugyhatiän. Coo Jesucristo miøjjä jiaančhä, coo jiaančh tehñ yhojiäya'ayä, paady hajxy tøø xyajnähdijjäm coo hajxy hoy njäya'ayhájtämbät. ⁴ Coo Jesucristo jaduhñ miøjjä jiaančhä, paadiä mayhajt møj may tiuna'añ maa højtscøxphájtäm. Jaduhñ jim myiñ cujaay maa Diosmädia'aguiän coogä Dios mayhajt may tiuna'añ maa højtscøxphájtäm. Homiänaajä hajxy xyagjugyhadäänäm neby je'e

jiugyhatiän. Y tøø hojiootä howyiinmahñdy hajxy xmióoyyäm hawiinjemybiä. Jaduhñ hajxy hoy nmøødhjítämät tu'ugmädia'agy. Jaduhñä haxøøgpä hajxy yaa hoy njøjyohdiúutämät hädaa yaabä naaxwiin. Ja'a häna'c-hajxy yaa ca'a mäbøjpä, hadsojwiinmahñdy hajxy miøød. Coø yhaxøøgwiinmahñdy hajxy jaduhñ quia'a najtshixø'øwa'añ, paady hajxy jüby quia'awa'añ haxøøgtuum. ⁵⁻⁷ Paadiä Diosmädia'agy hajxy tsøc mäbøjcäm. Tsøc hajxy hojiäya'ayhájtäm hamuumdu'joot. Tsøc hajxy jaac habøjcäm ja'a Dioscøxpä. Tsøc hajxy hjítäm najuøøyhaamby. Tsøc hajxy mee'xtújcäm. Tsøgä Dios hajxy wiingudsähgøøyyäm. Tsøc hajxy nichójcäm nebiä tu'ugpuhya'ayän, neby højtsä Jesucristo xchójcäm. Tsøgä jäya'ay hajxy nägøxiä tsojc méé'xäm, hoy hajxy näje'e quia'a jagä mäböcy.

⁸ Coø hajxy jaduhñ hamuumdu'joot ngudiúunämät nébiøch naamñä tøø nmädia'agy, mänit hajxy nhoyøøyyämät. Mänitä Jesucristo tiuung hoy ndúunämät. Nmøødhjítämä tøyhajt hajxy jaduhñ ja'a Jesucristocøxpä. ⁹ Hix, pønjaty jaduhñ ca'a cudiumb nébiøch naamñä tøø nmädia'agy, jaduhñ mäwínäts hajxy je'e nebiä wiinds nebiä xoodspän je'eguiøxpä coø hajxy tøø jiahdiägoy coø piojpä quiädieey hajxy tøø ñähwa'açhii neby hajxy hijty jegyhajty jiäya'ayhatiän. Jaduhñ hajxy tøø jiahdiägoobiä coø Dios jioot chocy coø hajxy hoy jiäya'ayhädät. Paady hajxy jaduhñ jia yajnähwaatsä. ¹⁰ Hoorä, mägu'ughajpädøjc, tsøc hajxy hamuumdu'joot cudíúunäm nébiøch naamñä tøø nmädia'agy.

Jaduhñ yajnajuø'owa'añ coo Dios hajxy tøø xyajnáhdíjjäm coo hajxy xquiu'ughadáañäm. Coo hajxy jaduhñ ngudiúunämät, cab hajxy jaduhñ mänaa ndu'udägóoyämät. ¹¹ Jaduhñ hajxy hoy yajxónñ nnócxämät Jesucristo wyiinduum maa cøjxta'axiøø yhane'emiän. Jaaya'ay hajxy nWiindsønñhájätäm. Tøø hajxy jaduhñ xyajnáhwáatsäm.

¹² Homiänájäts mijts jaduhñ nyagjahmiejtsta'aga'añ nébiøch naamnä tøø nmädia'aguiän. Tøyhájthøch jaduhñ tøø nmädia'agy. Hoy hajxy jaduhñ mjaty. Cab hajxy mdsoj jahdiägoyya'añ.

¹³ Hawiinmats jaduhñ cooçh mijts jaduhñ nyagjahmiejtstá'agät tehngajnä, mädúhñtiøch njaac jugyhaty. ¹⁴ Hamdsóøjøçhä Jesucristo xñämaayy cóogøch mobädajpä nho'ogaannä, ja'a hajxy nWiindsønñhájätämbä. ¹⁵ Pero cooçh hánajty tøø nho'ogy, hoy hajxy jaduhñ mjaac capxtá'agät nébiøch chamñ nmädia'aguiän. Jaduhñ hajxy hoy mjahmiejtstá'agät.

¹⁶ Tøø højts mijts nyajwiingapxø'øy coo Jesucristo møcmäjaa miøødä, y coo yaa jadähooc quiädaactägatsa'añ hädaa yaabä naaxwiin. Tøyhajt højts jaduhñ nmädiaacy. Cab højts hamdsoo nyajcojy. Diosmädia'agy hädaa jaduhñ. Ca'a ñä'a cueentä nebiä jäya'ay cueentä hajxy yajcojjiän. Hamdsoo højtsä Jesucristo nhijxy coo møcmäjaa miøødä, coo je'e Dyiosä. ¹⁷⁻¹⁸ Mänaa højtsä Jesucristo hánajty jimñ nmøøðän maa tunän, mänitä Diosteedy jimñ quiuhgapxnajxy tsajpootyp: “Høøçh nhamdsoo Huang yø'ø. Njaançh tehñ chójpiøch yø'ø. Jaançh tehñ jiootcújc-høch nni-

jwiø'øwyii maačh nHuungcøxpän”, nømä Jesucristo ñänøømä. Njaanč mädoow højts jaduhñ. Møcmäjaahaamä Dios jaduhñ quiapxy. Jaanč tehñ yajxonä Jesucristo piädaacä ja'a Tiéediäm, nebiä hajajpän. Paady højts yø'ø tun nyajxøøbejty: “Ja'a tun maa Dios ñägapxiän coogä Jesucristo yHuunghaty.”

19 Tøyhajt jaduhñ jiaanč jajty nébiøch chamñ nmädia'aguiän. Hamdsoo højts nhijxy nmädooyy. Hahixøøby jaduhñ coo højts mijts nmädia'agy xmiäbøjcät. Maas hahixøøby jaduhñ coo Diosmädia'agy hajxy mmäbøjpät, ja'a jäya'ayhajxy jecy quiujáhyyäbä. Jaduhñ mäwíinädsä Diosmädia'agy miäbaady nebiä jøøn tioyyän hagogdstuum. Hix, xyajwiinjuøøyyäm hajxy jaduhñ tijaty hajxy hoy hamdsoo nga'a wiinjuø'øwáanäm. Hahixøøby jaduhñ coo hajxy homiänaajä nyajcopcøøyyämät. Coe Jesucristo yaa quiädaactägätsät hädaa yaabä naaxwiin, mänit hajxy cøxiä xyajwiinmädiaagø'øwáanäm. Jaduhñ hajxy hoy nwiinjuø'øwáanäm cøxiä. 20-21 Huuc wiinjuø'øw hajxy jaduhñ, coo jäya'ayä Diosmädia'agy hajxy jecy quiujahy, cab hajxy hamdsoo yajcojy. Näje'e hajxy jaduhñ quiujahy tijaty hänäjty jadäänäp tunäänäp. Ja'a Dios je'e najtscapxøøyy ja'a yhEspírituhaam waamb hajxy quiujáayät.

2

1 Jii jäya'ayhajxy hijty näje'e jegyhajty miäna'añ cooc tyijy Dios hajxy hänäjty ñajtscapxøøyyäbä. Pero høhñdaacp hajxy hänäjty jaduhñ. Ja'a Dioscu'ug hajxy hänäjty jia wi'i wyiinhøønaamby.

Jaanä jaduhñä hõhñdaacpähajxy jii by wiäditaambä maa mgajphtajxiän. Cabä cu'ug ñajuø'øwa'añ pø wiinhõhñäp hajxy hñajty jaduhñ. Høxtä mäna'anaambä hõhñdaacpähajxy jaduhñ cooc tyijy ja'a Jesucristo hajxy tøø xquia'a nähho'túutäm. Paquia hajxy yajcumädowa'añii. Pønjetiä hõhñda'agymiädia'agy mähøgaamb, tu'udägoyyaamb hajxy jaduhñ. Ja'a häna'c-hajxy jaduhñ hõhñdaacpä, niyhamigähadaañäp hajxy jaduhñ. ² Pahixáañäp hajxy jaduhñ nämay. Ja'a häna'c-hajxy mähahixaamb, ja'a tyijy ja'a Diosmädia'agy hajxy mähøjpä. Cooc hajxy jaduhñ hoy quia'a hida'añ, ni häna'c-hajxy hõhñdaacpä, ni häna'c-hajxy mähahixpä, paadia cu'ugä tøyhajt hajxy quia'a tsoga'añ ja'a Jesucristocøxpä. ³ Ja'a hõhñdaacpähajxy, xädø'øñ hajxy piøcjuø'øwaamb. Hõhñda'agymiädia'agyhaamb mijs xyajñähixø'øwa'añ; jaduhñä xädø'øñ hajxy xjia wi'i piøgaanä. Jéquiänä Dios tiägøøyy mänaañdaacpä coogä häna'c-hajxy quiümädowa'añ, ja'a hõhñda'agymiädia'agy hajxy yajñähixøøbiä. Jaduhñä Dios jecy miänaañdaacpä cooc hajxy quiuhdägoyya'añ.

⁴ Hix, yajcumädoobiä Dios je'e pønjaty ca'a mähøgaamb. Cooc mioonsähajxy näje'e jim jecy quia'a mähøjcy tsajpootyp, paady hajxy jecy quiümädooyy. Haxøøgtuum hajxy hoy quiuhjuijpnaxyii maa jiaanç tehñ quiøcän, maa yhagoodstuumän. Jim hajxy yhida'añ høxtä coonä yhabaadät cooc Dios jaduhñ miäná'anät nebiaty hajxy jii jiaac tsaachtuuna'añii. ⁵ Jaanä jaduhñä Dios ja'a jecyjiäya'ay yajcumädoobä, ja'a hajxy jecy tøø

quia'a mǎbóquiäbä. Mänitä Dios nøøgomdägoy quiejxy. Jayooyä Noéhajxy choocy møødä yhuung møødä tio'oxy ja'a näductujcpä. Jaduhnä Noé ja'a cu'ug hänajty tøø jia yajwiingapxø'øy coogä yhaxøøgcuhdujt hajxy ñajtshixó'øwät, coogä Dios hajxy wyiingudsähgø'øwät. ⁶ Jaanä jaduhnä jecyjiäya'ayhajxy jiajpä, ja'a hajxy hijty jim tsánaabiä maa cajpt hijty jaduhn xiøhatiän Sodoma møødä Gomorra. Cabä Dios hajxy hijty ñä'ägä wiingudsähgø'øy. Paady hajxy jøønhaam yajcuhdägooyä. Cøjxä haxøøghäna'c-hajxy yho'ogy. Haagä cujiaam hajxy jiajnä møødä quiajpthajxy. Hijxtahnd ja'a Dios jaduhn piädaac coo haxøøgjäya'ayhajxy nägøxiä yajcumädowa'añii. ⁷⁻⁸ Mänaa Dios ja'a jecyquiajpt jaduhn yajcuhdägoyyän, jagooyä tuljäya'ay yajtsoocä, ja'a hänajty xøhajpä Lot. Paadiä Lot yajtsoocä, je'eguiøxpä coo hänajty hoy jiäya'ayhaty. Mänitä Dios ja'a Lot yhawaanä coogä quiajpt hänajty quiuhdägoyya'añ. Paadiä Lot jim chohñ. Jaanç tehñ jiootmayhajpä Lot hänajty jaduhn coo cu'ughajxy hänajty haxøøg jiatcø'øy jabom-jabom hijxwiinduum. ⁹ Nebiä Dios ja'a Lot jecy yajtsooquiän, jaanä jaduhnä Dios ja'a quiu'ug yajtso'ogaambä coo hajxy hänajty chaaçhpøcy. Tøyhajt jaduhn. Jaanä jaduhn tiøyhajtäbä coo Dios yajcopcø'øy nebiatiä haxøøgjäya'ayhajxy jiatcø'øyän. Jéquiänä Dios jaduhn miänaañ cooc hajxy quiumädowa'añ. Coo jaduhn yhabáadät, mänitä Dios miäna'ana'añ nebiaty hajxy jii chaaçhtiuna'añii. ¹⁰ Nägø'ø nädequiä Dios yajcumädowa'añ pøn yajnähixøøby høhnda'agymiädia'agyhaam, pønä Diosmäjaa

xøøghajp. Jaanch tehñ chähdiuhñdägoy hajxy ñibiäda'agyii, ja'a høhnda'agymiädia'agy hajxy mäwädijpä. Jootmøj hajxy jaduññ ñibiäda'agyii. Cab hajxy pøn wyiingudsähgø'øy. Haa jaaya'ayhajxy mõjtuungmøødpä maa Diosmädia'agy myiñänä, wiingapxpéjtäp hajxy je'ebä. ¹¹ Haa ja'a Diosmoonsähajxy jim hijpä tsajpootypä, maas møcmäjaa hajxy miøødä quejee ja'a høhnda'agymiädia'agy hajxy mäwädijpä. Pero cabä Diosmoonsä ja'a mõjtuungmøødpä hajxy wyiingapxpety maa Dioswiinduumän; ni cab hajxy ñähojy.

¹² Jaduhñä høhndaacpähajxy ñibiäda'agyii nebiä yuughanimalän coo hajxy tii quia'a wiinjuø'øwa'añ ja'a Dioscøxpä. Hix, cabä yuughanimalhajxy tii wyiinjuø'øy ja'a Dioscøxpä. Mädyiijatiä høhndaacpähajxy quia'a wiinjuøøby, je'e hajxy ñäxiicypy. Paquiä hajxy yajcuhdägoyya'añii nebiä animalhajxy paquiä quiuhdägoyyän coo hajxy yagho'ogyii. ¹³ Tsaächtiunáanäbä høhndaacpähajxy jaduññ je'eguiøxpä coo hajxy hänäjty tøø miädsaaçhtiuñ. Xoonäacp hajxy jaduññ coo hajxy cøxypänejpä jiatcø'øy xøømbaady. Høxtä jilby hajxy yajtägø'øy maa mijts naxxy mgaamiuquiän ja'a Jesucristocøxpä. Ja'a Jesucristo miädiá'aguiäc tyijy hajxy pianøcxäp. Pero haxøøgjaty hajxy wyl'i jiatcø'øy mijts mwiinduum maa hajxy hänäjty mgaamiuquiän. Høxtä jilbypiaady hajxy je'e yhøhndaacpä.

¹⁴ Homiädyii to'oxiøjcä hajxy jaduññ yhixy, yhadsojpy hajxy jaduññ. Homiänaajä hajxy jaduññ haxøøg jiatcø'øwa'añ. Wyiinhøhmby hajxy pønjatiä Diosmädia'agy hoy ca'a habøjpnä.

Hadsojwiinmahñdy hajxy ñä'ägä yajtuumb̄y. Tsipc̄xp hajxy jaduhñ ñä'ägä cumädowa'añ. ¹⁵ Tøø tødiu'u hajxy jiojwa'açh. Tøø hajxy jaduhñ tiu'udägoy. Ja'a Balaam hajxy jaduhñ piahijxyp, ja'a Beor yhuung. Jeguiajtiä Balaam hānajty quiudiuna'añ ja'a quia'awiindøguiøxpä møødä xädø'øñguiøxpä. ¹⁶ Mānitä Balaam wyiinhojnaxjä tiic jaduhñ coo jiatcø'øwa'añ. Ja'a møjc burra jaduhñ māhoj. Jaduhñ quiapxy nebiä jāya'ayān. Mānitä Balaam ñajuøøñä coo jaduhñ quia'a hoyyā. Jaduhñä burra miādia'agy miäbójcäxä.

¹⁷ Yøø hāna'cä hōhñda'agymiādia'agy hajxy māwādijpā, jaduhñ māwiin hajxy miābaady nebiä nøøjut tøø tiø'øçhpān. Jaduhñ māwiin hajxy miābaatpā nebiä joc piojwāditypān coo hānajty quia'a nā'ägä tu'uy. Hix, cabä tøyhajt hajxy ñä'ä yajnähixø'øy. Cøjxta'axiøø hajxy jiīby yhida'añ maa haxøøgtuumān. Ja'a Dios jaduhñ mānaañ cooc hajxy jiīby yhida'añ. ¹⁸ Yoñ hajxy jia mādia'agy. Ja wi'i yajcumayaamb̄ hajxy jaduhñ. Pero cabä miādia'agy hajxy choobaady. Ja'a hōhñda'agymiādia'agyhaam hajxy wyiinhøøñ pøn̄jatiä Diosmādia'agy naamdägø'øy habøjp. Jøjcapxøøyyäp hajxy jaduhmbā, ween hajxy haxøøg jiatcøøguiumbā neby hajxy hijty jiatcø'øyān. ¹⁹ Jaduhñä hōhñdaacpāhajxy yajnähixø'øy cooc tyijy quia'a nejpiä coo haxøøg mjāya'ayhādāt. Hix, jaduhñ hajxy yajnähixøøbiä cooc tyijy ja'a Dios hajxy xquia'a hanéh̄mānā coo jecymiādia'agy hajxy ngudiúunāmāt, jaduhñ jia mānaambā cooc hajxy hoy njāya'ayhājtmāt. Jaduhñ hajxy yhōhñdaacpā

cooc tyijy hajxy jaduhyyā nnāhwáatsām. Ni je'e hajxy tøø quia'a nāhwa'ačh je'eguiøxpā coo yhaxøøgwiinmahñdy hajxy tøø quia'a najtshixø'øy. Paady hajxy nøcxy quiuhdägoyyaanñā. Jaanā jaduhñ højtshájtāmbā, coo nhaxøøgwiinmahñdy hajxy nga'a najtshixø'øyyāmāt, jaduhñ højts nøcxy nguhdägoyyāanñāmbā. ²⁰ Coo Jesucristo hajxy njøjpøgø'øyyām, ja'a hajxy nWiindsøn'hájtāmbā, paadiā nhaxøøgwiinmahñdy hajxy xyajñāhwáatsām, neby hajxy yaa nmøødhájtām hádaa yaabā naaxwiin. Pero, coo Jesucristo miādia'agy mjahdiägóoyyāt, y coo mhaxøøgwiinmahñdy jadāhooč mbadu'ubøgāt, maas haxøøg jadāhooč mjada'añ. ²¹ Hix, pønjatiā Diosmädia'agy jaduhñ jahdiägooby, maas hoy haxøpy coo hajxy cu quia'a mäbøjcy. Hix, coo hajxy jaduhñ yhøxhíxāt, maas hanaxiä hajxy jaduhñ quiumādowa'añ. ²² Jaduhñ hajxy jiádāt nebiä hádaa mädia'agy miāna'añān: “Ja'a huc-hajxy, coo hajxy yhøøčh, ja'a yhamdsoo høøčh hajxy ñāwiimbijpy, nøcxy hajxy jadāhooč jiøø'xø'øgy. Jaanā jaduhñä hädsømhajxy jiatcøøbiä, naamñā hajxy hānajty tøø chí'iy, mänit hajxy jadāhooč nøcxy yajtsnä tiøø'pnā mo'ondsooty.” Tøyhajt jaduhñ.

3

1-2 Mägu'ughajpädøjc, miämetsc-hoočpä mijts chamñ nnājaayø'øy. Jaduhñ mijts chamñ miämetsc-hoočpä nmägapxy nhane'emy coo mädia'agy hajxy mjahmiejtstá'agāt, ja'a Diosquexypähajxy jecy quiujáhyyäbā. Jaduhñä howyiinmahñdy hajxy mmøødhádāt. Huuc

jahmiets hajxy jaduhmbä nebiatiä Jesucristo hajxy xmiägäpax xyhanéhmäm. Jaaya'ay hajxy tøø xñähho'túutäm, paady hajxy nWiindsøñhajtäm. Ja'a Jesucristo quiugapxyhajxy, je'e mijts tøø xyhawaanä nebiatiä Jesucristo hajxy tøø xmiägäpax tøø xyhane'emy.

³ Naxy hädaa mädia'agy hajxy mdehm wyiinjuø'owät nébiøch cham nmädia'aguiän. Coö naaxwiimbä hänajty wyiimbida'añ, mänitä jäya'ayhajxy quiähxø'øga'añ coö Dios hajxy ñänøma'añ. Haxøøg hajxy jiatcø'øwa'añ nebiatiä yhamdsoo joot hajxy hänajty chocy, neby hajxy hänajty ñä'ägä cuhdujthatiän. Xñäxi'igaamb mijts jaduhñ. ⁴ Jaduhñ hajxy miäna'ana'añ: “Cab jaduhñ tiehm tiøjiada'añ coö Jesucristo wyiimbijtägatsa'añ neby jaduhñ tøø yhuuc mänaambä. Hix, caj tii mänaa tiägach. Je'enä cøxiä wiinä jaduhñ yhityñä mänaa naaxwiimbä jecy yhawijy tiøø'xta'aguiän, mänaa jecyjiäya'ayhajxy yho'oguiän”, nøm hajxy yhöñnda'aga'añ. ⁵ Pero tøyhajt jaduhñ coö naaxwiimbä jiaanç tägach. Pero ja'a höñndaacpähajxy, cabä tøyhajt hajxy wyiinjuø'øwa'añ. Hix, haagä nøø hijty jegyhajty. Mänitä Dios ja'a tsajt jecy yhädiuun møødä naaxwiin. Jiibiä naaxwiimbä yajcojy nøøjooty. Mänit hoy piäda'agy nøøhagujc. ⁶ Mänitä Dios nøøgomdägoy cujecy quiejxy. Mänitä naaxwiimbä quiuhdägooyy. Cøjxä jäya'ayhajxy yho'ogy. ⁷ Ja'a tsajt møød hädaa yaabä naaxwiin, tøø Dios jaduhñ yajnähdijy coö quiøxy toya'añ. Mänitac jaduhñ tioya'añ coö Dios ja'a jäya'ay yajcuhdägoyya'añ, ja'a Diosmädia'agy hajxy ca'a mäbøjpä.

⁸ Mägu'ughajpädøjc, tsøc hajxy jahmiéjtsäm coo Dios tu'xøø jaduhñ ñänømy jadu'miljomøjtpä; y jadu'miljomøjtpä, tu'xøøyyä jaduhñ ñänømy. ⁹ Näje'e jäya'ayhajxy miäna'añ cooc tyijy ja'a Jesucristo quia'a tsoj yajtøjiada'añ coo yaa quiädaactägatsa'añ, coo haxøøgjäya'ayhajxy yajcumädowa'añii. Pero cab jaduhñ tiøyyä neby hajxy jaduhñ jia wi'i yhøhnda'agy. Hix, mee'xtujpä Jesucristo ja'a mijtscøxpä. Cabä jioot chocy coo pøn quiuhdägóyyät. Jaduhñä jioot jia tsocy coo haxøøgcuhdujt hajxy nnajtshixóøyyämät.

¹⁰ Jaguiapxy yhabaada'añ coo Jesucristo yaa quiädaactägatsa'añ, coo haxøøgjäya'ayhajxy yajcumädowa'añii. Cabä pøn jaduhñ ñajuø'øy mänaa jaduhñ jiaanç habaada'añ. Mänitä tsajt quiuhdägoyya'añ. Jaduhñ yajmädowa'añ nebiä hänee møc ya'axiän. Cøxaambä xøø tioya'añ, møødä po'o, møødä madsa'a, møødä naaxwiimbä, møød tijaty yaa hijp hädaa yaabä naaxwiin.

¹¹ Coo cøxiä wiinä jaduhñ quiuhdägoyya'añ, paady hajxy tsøc hoy jäya'ayhájtäm. Tsøcxä Dios hajxy hoy wiingudsähgøøyyäm. Tsøcxä Diosmädia'agy hajxy hoy cudiüünäm. ¹² Tsøc hajxy jøbhíxäm coo Jesucristo yaa quiädaactägatsa'añ. Mänitä Dios ja'a tsajt yajtoya'añ, møødä xøø, møødä po'o, møødä madsa'a, møødä naaxwiimbä. Tsøgä jäya'ayä Diosmädia'agy hajxy yajmøødmädiácäm nämay, ween hajxy miäbøcy; jaduhñä Dios paquiä yaghabáadät. ¹³ Tøø Dios jaduhñ miäna'añ coogä hawiinjemyçhajt yhädiuna'añ, møødä hawiinjemyñaaxwiin. Jimä njoot hajxy nbädácäm coo Dios hajxy jim

xyajñøcxáanäm. Cabä haxøøgpä jaduhñ jim mänaa tiägø'øwa'añ maa ja'a hawiinjemybiä tsajtän, ni jim maa hawiinjemybiä naaxwiimbän.

14 Mägu'ughajpädøjc, tøyhajt jaduhñ coo Dios hajxy jim xpiäda'agáanäm, paadiä haxøøgpä hajxy tsøc najtshixøøyyäm hamuumdu'joot; jaduhñä Jesucristo hajxy xpiáatämät coo pojpä cädieey hajxy hänäjty nga'a møødhájtäm, coo yaa quiädaactägátsät. Tsøc hajxy jootcuyc nimiøødhájtäm nebiä tu'ugpuhya'ay nebiä tu'ugpuhdo'oxypän. Jaduhñä Dios hajxy hoy xyhíxämät coo hajxy hänäjty hoy ndúunäm.

15 Mjahmiédsäp hädaa mädia'agy hajxy jaduhñ. Paadiä Jesucristo jaduhñ miee'xtucy, weenä jäya'ayhajxy may miäbøcy, ween hajxy jaduhñ may ñähwa'açh. Ja'a mägu'ughajpä Pablo, jaduhñ mijts tøø xñäjaayøøbiä. Ja'a Dios ja'a tøyhajt najtscapxøøyyä. Ja'a tsipjatypä ja'a Dios ja'a Pablo yajwiinjuøøyy. Jadúhñhøçhä Pablo njuø'øy nébiøçhä nhamdsoo puhya'ayän.

16 Naaghooc mijtsä Pablo xñäjaayø'øy, jaduhñ ñä'ägä mädia'agyhaty nébiøch chamñ njaayän. Tsipjatiä Pablo siémpräm miädia'agy. Ja'a häna'cä tøyhajt hajxy ca'a tsojpä, wiingä Pablo miädia'agy hajxy yajñähixøøyyä. Cab hajxy jaduhñ yajñähixø'øy nebiä Pablo jia mänaañän. Wiingatiä Diosmädia'agy hajxy yajñähixø'øy. Cabä tøyhajtpä hajxy miäbøga'añ. Paady hajxy quiuhdägoyya'añ.

17 Mägu'ughajpädøjc, mnä'ägä najuøøby hajxy jaduhñ coo hønñdaacpähajxy jii wiädita'añ. Cabä tøyhajt hajxy chocy. Haxøøg hajxy jiaançh tehñ jiäya'ayhaty. Mnigwieendähadøøjäp hajxy;

jaduhñä tøyhajt hajxy mga'a najtshixó'owät. Cab hajxy myajwiinhóønät coo hajxy jaduhñ mnä'ä tu'udägóyyät. ¹⁸ Jaac habøcxä hajxy jaduhñ ja'a Jesucristocøxpä, ja'a hajxy nWiindsønähájtämbä. Jaaya'ay hajxy xñähho'túutäm. Tehngajnä miädia'agy hajxy mmäbójcät; jaduhñä mayhajt møj may tiúnät ja'a mijtscøxpä. Tsøc hajxy homiänaajä capxpáatäm møj jaançh. Tsøc hajxy tehngajnä wiingudsähgøøyyäm. Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

4e564219-157f-5807-b810-47a15308b8b8